




[www.BibleForChildren.org](http://www.BibleForChildren.org)




Genesis 6



Idwani siya na nan kaokhochan  
Noe. Tolo nan an-ak Noe ay  
cha Sem, Ham ya si Jafet.  
Siya nan takho ay nalenteg  
ya maid naknakwaniyana issan  
timpona, ya kad-in naiyornos  
ken Apo Dios.




Inoschongan Apo Dios nan  
lota ya chey, nafang-es nan  
semek nan am-in ay takho,  
tay chad-ama ay ngaag ay  
ik-ikkancha.



Sa et kanan Apo Dios ken Noe, "Sinmekko  
ay amasen ay amasen nan am-in ay takho,  
tay kholo yangkhay nan wad-ay ken  
chaicha isnan olay entona ay  
kawadcha. Nay et pakawasek  
tet-ewa chaicha ya nan am-in  
ay wad-ay  
isnan lota."




"Khomaeb ka is chakchakowag ay  
fangka isnan khawis ya pasig saeng.  
Kwartokwartowem ya ispartowam  
isnan chaem ya falana."



Siya na nan anghem ay  
mangaeb: Khab-em is  
sinkhasot ya tolon poo  
ya tolo ay  
mitro nan  
kaanchona,


ya chwan  
poo ya chwa  
ay mitro nan  
kalawana, sa et  
sinpoo ya tolo ay mitro  
nan katakchagna.



"En-ipenpen kayo akhes  
is kafangka si isyangkhay  
sis a y makakan ya nan  
kanen nan enkik-iwi."





Omiskhep kayo akhes is sin-as-asaswa isnan am-in ay  
ilan si enkik-iwi, manad-alan, enkadkachap paymo  
enkodkochong, ya am-in ay ilan si entat-ayaw,  
ta matakho cha.






Omiskhep ka is sinpipto ay sin-as-asaswa  
isnan am-in ay ilan si masibfan ay enkik-iwi,  
ngem sin-es-a'y sin-as-asaswa isnan ilan  
si enkik-iwi ay maipawa ay masibfan.






Idwani sinomkhep  
et cha Noe ay sin-asawa,  
nan an-ak ya iinnapocha  
is kafangka ta maikasiw  
cha isnan lifog.



A simple line drawing of a building with a window. The building is represented by several parallel lines sloping downwards from left to right. A small rectangular window with horizontal lines is positioned on the side of the building. To the left of the building, there is a small, irregular shape representing a hill or a cloud.

Osto ay enem khasot nan  
tawen Noe, isnan ikasinpoo ya  
pito ay akhew isnan maikadwa ay  
fowan, ket ay inmasyak nan am-in  
ay eb-eb isnan chaem nan lota, sa  
et kag wad-ay naikhowang ay  
kaaneanewang id chaya.





Et nen-ochaochan is epat poo  
ay akhew ya maschem.

Cha kayet omad-achaem nan  
chanom engkhana'y manalan  
nan fangka is kadchanom.




Inmad-achaem kayet nan chanom ya linin-ebna  
nan am-in ay kaat-atakchakhan ay filig. Siya,  
am-in ay enfibfiyag isnan lota et natey cha.



Eg-ay magtek nalichongan Apo Dios  
si Noe ya nan am-in ay enkik-iwi ay  
nakitee ken siya is kafangka. Ke  
na't ay inpal-i nan chakhem ya  
cha khomwab nan chanom.





Awni ya ket patayawen  
Noe nan kalopati ta  
mangammowana mo  
natchok nan chanom  
isnan lota.





Isnan maikachwan poo ya pito ay akhew isnan  
maikadwa ay fowan, ket ay naschok ay  
osto nan chanom isnan lota.



Sa et kanan Apo Dios ken Noe, "Fomala kayo  
am-in is kafangka, chakayo ay sin-asawa,  
ya nan an-akyo ya nan iinnapoyo, am-in  
kayo ay sinpangafong."



Sa et nentoping si Noe is altar ay  
enchad-ayawan ken  
Dios Apo. Ya inmala  
is sin-es-ang isnan  
masibfan ay enkik-iwi  
ya ay-ayam, sa na't  
pinoowan ay mafobfoker  
is kaaltar engkhana ay  
chomapo ay nangichoo  
ken Apo Dios.



Sa na't kanan,  
"Siya na nan maton  
ay kail-il-an nan  
maid pengpengna ay  
inkalik ken chakayo ya  
isnan am-in ay matatakho  
ay wad-ay ken chakayo, ya

isnan am-in akhes ay  
matatakho ay cha kayet  
mawad-ay. Ippeyko nan  
fongakhanko is kalifoo.  
Siya chi nan maton nan  
inkalik isnan am-in ay  
wad-ay isnan lofong."



Et mo ap-apak  
nan chaya isnan  
lifoo ya sa et  
wad-ay nan maila ay  
fongakhan, sesemkek  
nan inkalik ken chakayo  
ya nan am-iam-in

ay matatakho, ya at  
ad-i kasin maliblifog  
nan chanom ay  
mamakawas isnan  
am-in ay  
matatakho.



Binindisyonan Apo  
Dios si Noe ya nan an-akna  
ay lallalaki ya kinwanina,  
"Makhanakhanak kayo ta  
omangsan kayo ya entee  
kayo isnan olay entona  
issa isnan lofong."



"Siya chana nan an-ak  
Noe ay lallalaki ay finmala is  
kafangka: cha Sem, Ham ya si  
Jafet. (Si Ham nan aman  
Canaan.) Nan naycha ay tolo  
ay an-ak Noe nan ikik-it  
nan am-in ay takho."



Tay chachama nan layad Apo Dios  
isnan takho isnan lofong, inchawchawna  
nan es-esang ay Anakna, ta olay sino  
ay mamati ken siya, et ad-i  
madchongaw mod-i ket wad-ay  
fiyagna is eng-engkhana.





Roma 3:23 Tay fomafasol nan am-in ay takho, ya maid paat kaidchayawancha ken Apo Dios.

Roma 6:23 Tay nan sofalit nan fasol et siya nan etey, nay met achi nan ilayad Apo Dios et fiyag ay maid pengpengna ken chatako ay maiyornos ken Jesu Cristo ay Apo tako.

Hebreo 9:27 Nakedchengan nan takho ay matey is mamingsan yangkhay, sa et maokom ken Apo Dios.

Efeso 2:8,9 Tay isnan fachang Apo Dios naisalakan kayo maichalan isnan pammatiyo, ya faken chomalat isnan inangnenyo, mod-i ket siya na nan inlayad Apo Dios ken chakayo. Adi kad maid khotok si chomayewan nan olay sino, tay nan maisalakan tako et faken maigkhapo isnan khawis ay inangnen tako.



Roma 10:9,10 "Maisalakan ka mo papatiyem ay si Apo Dios et finangona si Jesus isnan etey, ya sam et ifaag ay si Jesus nan Apom." Tay nan takho ay tet-ewa nan pammatina, infilang et Apo Dios siya ay nalenteg. Ya nan takho ay mangifaag isnan pammatina, siya nan maisalakan.

Juan 3:16,17 Tay chachama nan layad Apo Dios isnan takho isnan lofong, inchawchawna nan es-esang ay Anakna, ta olay sino ay mamati ken siya, et ad-i madchongaw mod-i ket wad-ay fiyagna is eng-engkhana. Tay egay finaana Apo Dios nan Anakna isnan lofong ta okomena ay manosa isnan takho, mod-i ket ta isalakana chaicha.



1 Juan 5:11-13 Naay nan infakhan Apo Dios: Inchowana ken chatako nan fiyag ay maid pengpengna, ya nan poon nan nay ay fiyag et nan Anakna. Adi kad mo sino nan maiyoornos isnan Anak Apo Dios, wad-ay ken siya nan fiyag ay maid pengpengna. Ngem nan maid ornosna isnan Anak Apo Dios, maid ken siya nan fiyag ay eng-engkhana.

Isolatko chana ken chakayo ay mamati isnan Anak Apo Dios, ta ad-i kayo kasin enchwadchwa ay wad-ay ken chakayo nan fiyag ay maid pengpengna.



# Genesis 6 - 10

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Bontok, Central Bible (lbk) © 1992, Wycliffe Bible  
Translators, Inc. All rights reserved.

<https://www.bible.com/bible/1157/MAT.1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

